

## La lavandéra

*Peppino Casali*

La strà l'è silensiusa, 'mmò désèrta,  
gh'è in gir nänca un grì-grì,  
pö, cul fiù-fiù dla carèta,  
sidèll, fagòtt, la caplina in tì cavì,  
un ciciarà sùtt'vùs mé 'na preghiera  
la riva lé: la lavandéra.

La nebia che 'd nòtt l'ha quatà  
Cänàl mé 'na quèrta  
la 's prepara a cambià ca,  
chièta chièta la tira indré la so vélèta  
davanti a un mond indurmént e sbalurdì  
quasi pàr dì: "sä tä spétàt, tuca – a tì".

"Pica, sbàta, rsénta i pàgn  
l'è quést 'l tò destin 'l tò laùr,  
äd fa gnì bianch e nèt machè, mägàgn,  
pecà di traditùr, cun la fadiga, cul südur,  
e sä 't véгна i man a -sgùnfi o i dulùr i-s fänñ senti  
gh'è l'acqua 'd Cänàl clä 't pöda benédì".

Adés i t'hänn fât un munumént  
che pàr quälc' ho vist l'è un po' mis màl,  
gh'è pü rispètt né persòn inteligént  
tänt che a ruinà tütt 'còss l'è diventà nurmàl,  
ma sl'è insì, nca 'l céł 'l cambiarà culùr,  
davanti a ti mi sbasi la testa e 't mèti un fiùr.